

## Basef Ifimba Pita Nagi' Nanda'afi

### **Basef bandafi fagagi'i Pita nanda'afi**

1:1-2 Pita nasapa' dagala ananini naloma basef  
Godi ma esis Kristen

1:3-21 God nosaho'apa ananipai ma dei' monda'  
waf ananifi bu'wafi hiafi migikila' mali' mag-  
ape

2:1-22 Amom profet magambaso'ami manda'  
waf awafii ma anaf God nogagwamam  
akafimi awami

3:1-16 Nemaif Dembinaii anaf fegataga ma hia-  
haom hiami higiligalam. Ea' apa' mondanda'  
waf bu'wafi mondassasa.

3:17-18 Pita na'ipasa basef akutaifi ma fegewa'  
banagas

<sup>1</sup> Ae' Saimon Pita anda' maol Jisas Kraisi, anen  
nandandepe aposel. Ae' anda'ago basef ifimba ma  
ipa' amam nematawa pegefa' hapif fasini lu'wani  
na'amba atin si'i afa' ogofa'ani. Hapif inimba ipa'  
pefa'ana waf bu'wafi hilili'i Jisas Kraisi, anen God  
ape'inai nowambelapa mogotanimai.\*

<sup>2</sup> God natopalopepa dowaf ea' nanda' opalef  
ipe'ilifi fape sa'ombel awanelef. Ae' a'i amamba  
mondape si'ima ipa' ma ufia'w akwamba pege-  
gawa God noloma Jisas Krais Dembinai ape'inai.\*

*God nofalapa nosaho'apa ma mogape ananipai  
atepa*

\* **1:1** Ju 2    \* **1:2** 1 Pi 2:9

<sup>3</sup> Kraisnofalepa ma pefa' banagami mogogala'i ananimi atom pegalomana. Ama banagami God nagaso'anami atom anen naso'apa fe' bu'wani hiahaom amamba fasimi hi'alama mope andeande' mogaila waf Godi. Krais nanda'apa na'amba ma ufia'w akwamba mogogawa anen atona.

<sup>4</sup> Banagami mogogala'i amamba atom anen naso'apa basef ananimi naga'i endilisi atinami. Basef amamba lu'wami fasimi a'owa'. Basef amamba atom ipa' pataga la'ifipama pegefa' ambal namili ma waf Godi pegalomana. Ama pefa' pefei' pindihi'ama hiahaom amamba awami mataga manda' ukup pegehafel a'owa' ma waf awafii mape itap apa'e manda' epes awasii.

<sup>5</sup> Ipa' ukup pepoma hiahawes isimba pendanda' maol banagambel endilisi dondo' ma ikwafa pepel ipe'ini piwatania hapif ipe'ini penda' waf bu'wafi atef. Ea' piwatania waf afamba bu'wafi ma pegefa' gawa bu'wani.\*

<sup>6</sup> Ea' piwatania gawa inimba ma waf nomonas sondapaipa pimafi alop andeande' datima. Ea' piwatania waf pigimafi alopafi ma waf pigalutu banagepamafi, pegefa' nimanimi. Ea' piwatania waf pigalutu banagepamafi ma penda' waf pegasa'ma agol ananigili.

<sup>7</sup> Ea' waf afamba hiafi bu'wafi fagali'i piwataniaf feloma waf ukup pindaima atina sahin owanaafi. Ea' waf afamba ukup pindaima atinafi piwatania waf bu'wafi pegatopalopa sahin owanaafi.

<sup>8</sup> Ipa' pegawa Jisas Krais dembinai ape'inai anen kofagonama waf afambai hiafi hi'alaf. I'i

---

\* [1:5 Ga 5:22-23](#)

waf afamba fepe ipa' banagefa fetaga lu'uf a'owa' fikila' pali' panda'afi, gawa inimba ipe'ini ina atiasi nepe dowaf, owa'atin. Atiasi a' netaga nefe' lu'win newalapai waf fasifi hiafi.

<sup>9</sup> Apa' open mamahina waf afambai akani, anin ina atiasi niti hiahawes sagape lauguni negawas, owa'atin. Anin si'i naep pagaso'ani ea' okom maso'an God nasa'opana nagakwahomana waf awafi hiafi anin nali' nanda'afi.

<sup>10</sup> Ea' ipa' penda' waf bu'wafi penda' maol banagambel endilisi pindikila' fowa' pali' panda'ana pagaila basef ifimba fowa' Godnofalepa nosahe'epa ma pagape ananipai atipa. Penda'as na'amba ma pegegawa endilisi Godnofalepa nosaho'epa ea'. I'i ipa' pelam penda'am atapipa, atiasi ina pewa ma anef waf awafi, owa'atin.

<sup>11</sup> I'i ipa' pigailam, dao' andeande'ma anaf God nonda' ufia'w kogal alihii'wa pendagala pefe' pigawis anamba anen nagala'ambemagoma nagape atapigin lifilafima. Anen atona nagatopalopapa ma dei' magape andeande'i.\*

<sup>12</sup> Endilisi, ipa' pegawa hiahawes isimba ma basef ifimba fagali'i ea' pahapifif banagepa ma basef ifimba endilisifi palutu la'ifipamef. Owa' owa'atin, ae' a'i ata' inda'ipipa atina egasa'ma ukup ipe'ipi ma pendanda'ma basef ifimba.\*

<sup>13</sup> Nimaguf hiafi hi'ilif ae' epe namowe elomepa itap apa'e, okom mandanda' a'i i'ipipa timbi tambela egasa'ma ukup ipe'ipi ma basef ifimba.\*

---

\* **1:11** Ju 5   \* **1:12** 2 Pi 3:1   \* **1:13** 2 Ko 5:1; Jo 21:18-19

**14** Ae' egawa nogota bandata ma atiasi elamona ambal ae'ali ma sehe egaga' si'i Dembinai ape'inai Jisas Krais niglihimba'me ea'.

**15** Isimba atis dei' a'i enda' maol banagambel dondo' ma ikwafa pepel ae'ani enda' ano'w ufa'wa anif nimaguf hiafi ae' egaga', ipa' ukup pendanda'ma basef ifimba pepe pegegawef.\*

*Afa' wati banagami mogogala'i Godi magape Kraisi ea'*

**16** Afa' wa'ipipa ea' pegawa banagami Dembinai ape'inai Jisas Kraisi ma anaf notanima nifi'i nogoloma banagami lu'wami. Apa' afa' ina waila anom basef numunefis dowaf epes gawaisi saga'iami wa'ipipa basef ifimba Kraisi, owa'atin. Afa' watolona endilisi nogofa' banagami mogogala'i fasimi Godi ma naep afa'ipi, isimba atis dei' wa'ipipa.\*

**17** Afamba afa' wape wagalomana halafuta atamba, wati anen nofa' agol lu'wagili galoma banagami mogogala'i fasimi ma lagol Ahamana Godi. Nema afamba anagol malogol ga'i gatagai God nagapoma gafi'mai Jisas ga'i, "Anamba Nogame ae'anai okom magamagailana a'owa'i. Okom ae'ami bo'oma anen."

**18** Afa' wape walomana halafuta atamba God nandandepatai bo'wagoma ea' wame' basef ifimba malagol agalemba ga'i gagatagai ilifi.

**19** Afa' atofa ukup pandanda'ma basef ifimba God naga'iefi wame'ef afamba wagape halafuta atamba. Basef ifimba fewa' banaga basef fowa'

\* **1:15** Mt 17:1-5    \* **1:16** Mt 17:5

amom profet maga'iefi ea' wahapilif banagef wa'i endilisi atis.

I'i ipa' peme' basef ifimba amamifi ukup kilikala' pepemef, dao' andeande'. Dei' main, basef ifimba si'i anin nagwapin fagandini nape nege-gala' akoti. Ea' negala' nape atapin nafi'i nataga a' lala. Ama ondo'w kuhimbitai'wi lagalama'wi kogohafili opalef ipe'ilifi nomon.

<sup>20</sup> Apa' ipa' ata' pendegawa basef ifimba atapi-pamef. Ina anona profet atotona naila okom ananimi atom dei' na'i anif basef kofagefa amom profet fowa' manda'ef fagail buk Baibeli, owa'atin.\*

<sup>21</sup> Dei' main? Fowa'ina anin epen atitin na'i anif basef mogofa'efa Godi ma okom ananimi atom, owa'atin. Ambal bu'wali Godi atona NASA'mai nomonas amom profeti nasindi'amonam ea' mofa' malagol ananigili ma'i basef ifimba.

## 2

### *Wafamom profet manda'afi baso'afi*

<sup>1</sup> Fowa' anom profet magambaso'ami mataga la'afena esis amam nematawa Israel mambaso'masa basef baso'ami. Dei' na'amba atin atiasi anom amam magambaso'ami mosafel la'afena ipa' wapani ea' mondambaho' mifl'i mombaso'mepa mi'ipipa basef mamimami hiami baso'ami magahambombaga epesi. Dembinai anen fowa' naga' ma natala amom amamba nagatagwahoma waf awafi ma mogape andeande'. Apa' owa', amom mowa'ana alafugah wapani. Atiasi monda'as na'amba atin, owa'

---

\* <sup>1:20</sup> 2 Ti 3:16; 1 Pi 1:11

kwafalis atis mohambombaga amom atom motaga aom.\*

<sup>2</sup> Amom manda'as na'amba atiasi anis amam nematawa hiasi sila waf naninani aunai amamu-nai. Ea' anis epes daias siti waf awafi amom magambaso'ami manda'afi ea' sosambala basef bu'wafi si'i basef awafi atifa waf bu'wafi endilisifi Godi.\*

<sup>3</sup> Amom amamba kowagalami endilisi, isimba atis atiasi monda' basef baso'afi ukup amamipi atip pagal'iefi ma mogofa' otamba mais ipe'isi. Apa' fowa' God a' nogawa nandandepa anef nemaf fapomam ea' ma nogawalogga amoma anaf higiligalam lamonam. God nandondomba anom maifah mogalamona amom endilisii ata' mape atapim mohafa amom. Ina ma'oh molola, owa'atin.\*

<sup>4</sup> God ina niambali' amom ensel mamahoma fowa' manda' waf awafi, owa'atin. Anen a' nali'amonam miliana wambel awambili hel. Ea' nowa'am sisihim mape atapim anamba akotigima mape masasa nemaf God nogowalogamafi.\*

<sup>5</sup> Anen ina niambali' esis amam nematawa fowa'isi sogowa' alafugahanai sape andeande', owa'atin. Anen nanda' embel lu'wami matef ma-has afis hi'alas. Anen numafi Noa atotona nagawalipasa basef bu'wafi Godii nofa'ana naloma epes 7-pelais wapani nofa'as sotanimai sape ande-ande!.\*

<sup>6</sup> Ea' nahambombaga epes hiasi sagape walemb bialembi lu'walimbi Sodomi Gomora wapani.

---

\* **2:1** Mt 24:11; Ju 4      \* **2:2** Ro 16:18; 1 Te 2:5      \* **2:3** Ju 6      \* **2:4**  
Jen 6:1-8:22; 2 Pi 3:6      \* **2:5** Jen 19:24; Ju 7

Epes isimba walemb ambalembai God nahagon naofagon nif lu'wafi ea' agambeh atembeh hotawa. Anen nagwamasa waf awafi esis sanda'afi nanda'as si'i anol ametala akafimi lu'wami epes mamahisa sogosambala basef ananifi anaf sogofa'ami.\*

**7** God natopalopa aman anamba bu'unai Lot numafiana nofa'ana notanimai nape andeande', ina aona lamonana, owa!. Anen okom nimanim endilisima waf awafi so'a waulafi alugufi amom manda'afi, mogosambala basef Godii.

**8** Aman anamba bu'unai Lot nape la'afisa nalomas dondol name'ama waf awafi amom manda'afi nalomam natelef. Okom ananimi a' nimanim a'owa' ma waf afamba amom mogosambala basef Godii manda'afi.\*

**9** Basef ifimba fa'ipapa alihif fa'i Dembinai nugumafi epes bu'wasi sagaila waf ananifi andeande'. Nemaif mamahefa gwamba maim mogatagamas, anen nogawa ea' ma nigili'amasa sogape andeande'ma gwamba amamba. Apa' anen nahapila esis sanda'waf awafi ma nogagwamasa akafimi ma waf awafi esis sanda'afi sope atapis sofe' sotagama nemaf afamba anen nogawalo-gasafi.\*

**10** Basef ifimba endilisi atis fapoma epes mamahisa ukup pegehafema waf alugufi alop atopafi ma ukup pa'i basef Dembinaii saga'i falafifii. Epes isimbai anaf sofa' akafimi lu'wami a'owa'!

Amom magambaso'ami manda' du'wanigama

\* **2:6** Jen 19:1-16   \* **2:8** 1 Ko 10:13; Ju 6   \* **2:9** Ju 7-8,16

magaila ukup amamipi atipi masa'ma agof amamugufi atogof. Amom ina ombal maham kwasakwasala manda' anom ensel awami magape ilifi findiwam, owa!.\*

<sup>11</sup> Apa' amom ensel bu'wami banagami endilisi mikila' amom amamba magambaso'ami, amom ina magwas manda' ensel amamba awami findiwam manda' kotimama naep Dembinai, owa'atin.\*

<sup>12</sup> Hiahawes amom magambaso'ami owa' mogogawasia, amom ma'i basef awafima isimba. Amom si'i mafis magail alupi ukup owa' pigapaumia magaila alop atop wafipii. Mememi mola mafis isimba ma anis epes sowando'mam sofa'am soham afum higiligalam ea' na'amba atina amom amamba wapani anaf awasim higiligalami.\*

<sup>13</sup> Amom manda' waf naninani aunai maso'as akafimi anis epes daias. Ea' anaf God nogwamama mogofa' akafimi wapani. Amom ukup pandanda'ma waf afamba saga' gwa'aisi embel maisafi faloma waf awafi so'a waulafi a sonohas endilisi ma sonda' waf afambai alip. Ea' ma' gwa'aisi maloma ipa', apa' waf awafi amamifi si'ianol ametal aluguli awali la'afena ipa'. Amom mape malomepa mandagalama waf awafi amom manda'afi.

<sup>14</sup> Dondol naep amamipi petaoma nematawa wanda' waf awafi lifilafi ma monda' waf awafi mogalomawa, amom ina makwaha waf afamba, owa'atin endilisi. Amom maga'i'ipa anis epes da'asa mombemefas sonda' waf awafi. Amom mo-

---

\* <sup>2:10</sup> Ju 9    \* <sup>2:11</sup> Ju 10    \* <sup>2:12</sup> Ju 12

gawa endilisima waf afamba awafi kowagalasafi ma hiahawes anis epes daiasi. Anaf God noham-bombagam endilisi.\*

**15** Amom mowa' alafugaha ufia'w usi'i'wi, isimba atis dei' ukup paolam a'owa'. Amom maila waf anona aman Balami, Beor nogamana. Anen okom mohafela nanda' waf awafi ma nogofa' otamba hiambai.\*

**16** Owa' neme' basef banagafi fa'ipana dindinipa nogokwaha waf afamba awafi. Basef ifimba donki ananini atin nega na'ipanaef si'i epen naga'i nasopama ufia'wa waf afamba awafi ukup pagahasafi profet anamba na'i nond'aifi.\*

**17** Amom amam na'ambaimi si'i waiwa amamba magal mogowalai itapi embel akami. Amom mandahama si'i ilagw fufin lu'unai nufapusam nawalom magafe' atona biana daindai. God nandondomba akot lu'unai endilisi alialina a'owa'i ma anaf amom mogapaogon.\*

**18** Amam amamba manda' du'waniga gigal ma'oh dowadowafa basef falafalafifi awafi amamifi. Amom maga'i'ipa anis epes daindaisa waf ukup pigahafemafi ma so'a waola waf naninani aunai alop atopi. Amom manda' waf afambai ea' mambemefa anis epes ata' dei'aol sataga sa'i sogakwaha waf awafi epes isimba sogololama Godi sanda'afi ea' mambemafas saila amom.\*

**19** Amom ma'ipa anis epes ma'i, "I'i ipa' pila basef afa'ifi, dao'ipa' atiasi pepe andeande'ma ina

---

\* **2:14** Nam 22:7; Ju 11; Re 2:14      \* **2:15** Nam 22:28-35      \* **2:16**  
Ju 12:13      \* **2:17** Ju 16      \* **2:18** Jo 8:34

anis maefah sowasi'ipa, owa'. Pepe wahifipa."

Apa' owa' amom magape lafela waf awafi, amamba mawasi'am sisihim. Dei' main, i'i anis maefah sombemefa anin open, atiasi open inimba ea' atapin nepe lafela hiahawes isimba sagambe-mefani.\*

<sup>20</sup> I'i epes mamahisa sokwaha waf awafi hiafi itapafi fanda' epes awasii sogogawa Dembinai ape'inai Jisas Krais nowambelapa mogotanimai, ma i'i waf afambai awafi fehekela esis wapani ma fiwasi'as sisihisa, anaf asope atapis na'amba. Sagali' sape awasis sisihisa waf awafi, ata' sape awes kwasakwasala. Apa a'i owa' sagi' sanda' waf awafi wapani, ea' sape sisihis awes endilisi ma waf awasifi.\*

<sup>21</sup> I'i esis ina sofa' gawa ma ufia'w akwamba ma owa' sogawa mu'uli bu'wani Godia, ata' sope awasis kwasakwasala. Apa' dei' sowa' alafugahana ea', anaf sope awes endilisi a'owa'!\*

<sup>22</sup> Waf afambai fagatagamasi asi'i anif basef endilisifi epes gawaisi saga'iefi faga'i na'amba fa'i, "Nombat totanima tafe'taga'tagago'wami atatimi wapani."

Anif wapani faga'i, "Bol lafe' lasa'of ea' ma main, owa' lotanima lafe' lambani itap walambuf folo'wagalagoma wapani."

### 3

#### *Endilisi atis Dembinai notanima nogafi'ii*

<sup>1</sup> Ipa' alipipai endilisi, basef ifi'i fagafe'ma bifi anda'ef fagail okwatihi fafe'mago ipa'. Basef

---

\* **2:19** Mt 12:45   \* **2:20** Lu 12:47-48   \* **2:21** Pro 26:11

ifimba biafif fagali'i faloma ifi'i ase'epaef ipa' ma fegasa'ma nomonas fasisi ipe'isi ma pegegawa basef ifimba.\*

<sup>2</sup> Ea' ae' a'i ipa' ata' ukup pendanda' wapani ma basef ifimba fowa' amom profet Godi magawalapafi. Ea' ukup pendanda'ma basef banagafi Dembinaii, nowambelapa mogotanimaii, ipa' ea' pegefa'ana lagof afa' aposel ipe'ifai.\*

<sup>3</sup> Ipa' ata' ukup pagawa isimba sindali'. Nimaguf ifi'i fagagi'i anom amam monda'iafipai motaga migi'ma ukup awapi amamipi ma waf amamifi. Ea' monda'iafipa na'amba\*

<sup>4</sup> mi'i, "Anen na'i basef endilisifi atif na'i nogafi'i wapanii. Apa' dei' anen ata' nape ani? Nogota fowa' dambadamba bafasapa sagaga'atai hihaoom amamba hiami hi'alam ata' mape atapim na'amba atin si'i fowa' dambadamba itap apa'e pagataga mafi'i mataga dei'."\*

<sup>5</sup> Apa' nomonas amamisi mandaiwa', dei' owa' mogawa hiahawes isimbaia, owa'atin. Amom ina ukup pandanda'ma fowa' gani God na'i atina nanda' itapi otaga sataga sagape, owa'. Anen nanda' itap pandahi' pataga pape la'afena embel.\*

<sup>6</sup> Owa' God nanda' embel lu'wami mataga itap maofanap hi'alap mahambombaga epesi hihaoom magape itapi hi'alam.

<sup>7</sup> Basef Godi ea' ifimba atif dei' fili'ama hihaoom magape ilifi maloma epes saloma hihaoom magape itapi hi'alam dei' ata' mape atapim masasa nif fegandom nemaf afamba God nogawaloge epes

---

\* **3:1** Ju 17; 2 Pi 1:13    \* **3:2** 1 Ti 4:1; Ju 18    \* **3:3** Ais 5:19; Esi 12:22; Mt 24:48    \* **3:4** Jen 1:6-9    \* **3:5** Jen 7:11-21; 2 Pi 2:5

isimba sogowa' alafugaha anini ma nond'a's higilgalas.\*

<sup>8</sup> Ipa' alipipai endilisi, ipa' owa'i ukup pese'epama anis hiahawes atifisa. Okom Dembinaii na'i nemaf atetef a' si'i afagof hiagufi 1,000-pelaiguf ea' afagof 1,000-pelaiguf fandahama si'i nemaf atetef.\*

<sup>9</sup> Dembinai ina nanda' maol lalag atina nogawalapai hiahaom anen okom mandanda' na'i endilisi atisa nond'a'mi si'i anis epes ukup pandanda'ma maol sanda'an lalag atin, owa'atin. Anen nandaiwa'ma anin epen atitin higilgalan. Anen okom ma'i epes hiasi hi'ilas sombema nelelemb sondafe'ma anen. Isimba atis dei' anen okom mapoma ipa' dei' nape nasasaipa palomas.\*

### *Anafitapi otaga ilifama'e ahigililam hi'ilam*

<sup>10</sup> Apa' nemaf Dembinai nogafi'afii anaf fifi'i si'i epen nanda' wali nagafi'i. Nemaf afamba otaga bendagola mehip ahigililam. Ea' hiahaom amamba hiami magapaunai wapani atiasi ea' fendom fesopamam hi'ilam. Itap apa'e wapani peloma hiahaom hiami sanda'am magape itapi anaf nif fendom fesopamam hi'ilam.

<sup>11</sup> Endilisi hiahaom amamba anaf higililam hi'ilam na'amba. Apa' ipa' atiasi penda' main? Ipa' pepe pindaila wafusifi bu'wafi hilili'i atef ea' pila waf hiafi Godi.\*

<sup>12</sup> Ipa' penda'as na'amba ukup dag pepe pendehafa nemaf lu'wafi Godi, pendanda' maol ananini banagambela pegemaso' nemaf afamba fegataga.

---

\* **3:7** Sam 90:4   \* **3:8** Hab 2:3; 1 Ti 2:4   \* **3:9** 1 Te 5:2; Mt 24:29,35

\* **3:11** Ais 34:4

Nemaf afamba atef anaf otaga fendena fitai'wana ea' nif lu'wafi a'owa' fendo hiahaom amamba hi-ami magape otagai hi'ilam motaga mumbul mefe' si'i embel.\*

<sup>13</sup> God na'i basef endilisifi atifa nonda' otagai itap dambaisi ma waf usi'ifi atef fegapaogoma. Apa' dei' ea' ukup dag mape mohafa isimba atis.

*Apa' mundumafuma andeande' ukup dag mope mohafa nemaf Dembinaii*

<sup>14</sup> Alipipai ae'ipai endilisi, ipa' ukup dag pape pegehafa hiahawes isimbai. Ea' ipa' pendanda' maol banagambel pindimafi ipa' pegape be'epa hilili' andeande'ma waf awafi akepa ma naep Godi, pape opaf atof pegalomana.\*

<sup>15</sup> Dembinai ata' nimanis nape nasasa apa' epes hiapai hi'alapa. Ea' dei' ipa' ukup pendapoma basef ifimba anen nowambelapa mogotambili. Isimba na'amba atin si'i basef ifimba hiafi sa-homapa Pol apa' ukup pagapagailanai nanda'ef fagafe'ma ipe'i. Anen nanda' basef ifimba ma gawa bu'wami endilisi God nagaso'anani.

<sup>16</sup> Aho' basef hiafi anen nanda'afi ma nemaf afamba Dembinai nogafi'afii nanda' ifimba atif. Apa' anif basef nanda'ef fagail buki ahifif endilisi ma mogogawa kofagefa. Basef ifimba ahififi, epes isimba gawa akasi ma owa' sugalutu banagesia isimba salalamona basef ifimba faloma anif daif hiafi wapani fagail Baibeli. Ea' esis atis sanda-hambombaga esisa anaf lamonas hi'igalas.\*

\* **3:12** Ais 65:17; Ais 66:22; Re 21:1,27

\* **3:14** Ro 2:4; 2 Pi 3:9

\* **3:16** Mk 13:5,33; 1 Ko 10:12

<sup>17</sup> Alipipai endilisi, ipa' pegawas ea' hiahawes anaf sigi' sogatagai. Ea' pindumafuma andeande'. Na'amba amam amamba magambaso'ami ma mogosambala mu'uli Godi mohondo'epa pewa ma anef waf awafi.\*

<sup>18</sup> Apa' ipa' pape waf afamba Dembinai Jisas Krais nagatopalopapa dowafafi, nowambelapa mogotanimai pegawaf ea'. Ea' pendalutu banagepa ma waf afamba feloma gawa inimba Kraisi pindikila' fowa' pali' pape panda'as. Ae' a'i agol lu'wagili fasigili atogol dei' atapigil gopomana gofe' anaf owagama wapani. Endilisi.

---

\* **3:17** Ju 25

**Basef Bu'wafi Godi  
The New Testament in the Mufian Language  
Nupela Testamen long tokples Mufian long Niugini**  
copyright © 1998 Wycliffe Bible Translators, Inc.

Language: Mufian

Dialect: Mufian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

---

PDF generated using Haiola and XeLaTeX on 25 Aug 2024 from source files dated 31 Aug 2023

b0cff915-4005-598f-9bbc-38b1e35d47b1